

Historia belli Sueco-germanici. Hist. 6856.
1618-1629.

Motus animorum circa motum athenarum
succesorum in Germaniam. 1675.

1841. 72.

Frischman Joam.

MOTUS ANIMORUM

Circa

Motum armorum Svecicorum in

Germaniam,

& primùm quidem in provincias

Serenif. Principis Elect. Brandenb.

Marchiam & Pomeraniam.

M, DC, LXXV.



HISTORIA 6856 II

ANIMORUM MOTUS

Circa

Motuum animalium & vegetabilium in

Generibus

& primis in provinciis

Sereni Principis Elect. Brandenburg.

Marchionis & Pommeraniae

MDCCLXXV.



Ubi non est, quin motus ille armorum, quo Sveci Germaniam, & quidem, primum Serenissimi Electoris Brandenburgici Provincias, Marchiam & Pomeraniam, nuper invaserunt; multas variasque cogitationes excitavit, easque initio perplexas, antequam literis & declarationibus hinc inde de causa & justitia hujus, vel invasionis hostilis, vel Hospitationis, transgressus, &c. amicabilem, ut aggressoribus eam qualificare placuit: adeoque de justitia vel injustitia ejus mundo innotesceret. Quid cum jam factum abunde, non minus tamen dubitandum est, omnibus Europæ Potestatibus, Rebus-publicis, imò & privatis, ad magnos variosque motus animorum ansam præbuerit, quos hinc aliquanto perscrutari animus: sine præjudicio ipsius causæ, de qua sub judice, summo scilicet Regum, lis est, ejusque decisio ab ejus justitia cum tempore expectanda.

Primùm *Summum Pontificem* mihi ut Catholico prætereundum non duco, qui etsi ab hoc armorum motu longè satis abesse & securus degere sibi videatur: Tamen recordari debet: quas olim Gothi Vandalique ex hac Septentrionali vagina Gentium exeuntes Italiæ, imò ipsi Romæ, calamitates intulerint, quorum primi citra mare suum progressus imbecilliores tunc fortè fuerunt, quàm isti, quibus nunc iterum Scenam inchoare velle videntur.

Dolendum equidem, quod in hanc sanctam Sedem, nescio casu an consilio, plerumque senes Decrepiti eligantur, qui paucis, quibus regere eam possunt, annis, longas atque in multos annos curas suas pro bono Ecclesiæ & totius Reip. Christianæ extendere & prosequi haud possunt: Easque potius ad exaltandos ditandosque Nepotes suos dirigant, eo ut altiores eos, Domusque & Basilicas eorum faciant. Sed eo magis Sacro *Cardinalium*

Collegio incumbere videtur, ut tanto prudentius, diligentius & majori cum effectu res Ecclesiæ curent, ne socordia vel *Unius* vel *Alterius* rerum potentis Respublica Christiana ex hisce turbis detrimentum capiat. Certum quidem est, Svecos longè satis à Roma distare, animum tamen eis illam aliquando invadendi non deesse, ex familiari illorum militum, Germaniam saltem ex scaphis suis appellentium, quæstione patet. Ne de Gallorum in Siciliam Insulam, occasione horribilis illius seditionis urbis Messinæ, ausu hîc loquamur, quæ ut olim urbis Romæ Granarium audit, si in Gallorum potestatem delaberetur, quid inde urbi timendum, satis in aprico est. Non minus itidem, quantum Svecorum, ut Galli mercenariorum, in Germania progressus ad id facere & conferre possint.

III.

Sed propius ad rem nostram, sicque ad *Cæsarem* accedamus; quis autem Majest. suæ de hoc motu armorum sensus, haud difficile est inquirere: Cum jam olim istius suasu, Gallorum in imperium ausus pro hostili invasione, Gallique ipsi pro hostibus Imperii, in conventu statuum ejus Ratisbonæ, sint declarati, & cum ut idem de Svecis fiat, summopere, nec sine spe successus, allaboret. Hocque non immerito. Quod & quantis enim modis illi pacem Westphalicam ferro & igne infregerint, & Rhenus & Mœnus, cum Mosâ, Mosellâ & Sara & Neccaro, satis nimium testantur. Et quod isti illorum mercenarii non meliora ad Oderam & Albim animo volvant, satis superque apparet. Quod ut Generalem Imperii causam dubium non est, quin universi ejus ordines sint perperisuri. S. autem Cæsar. Majest. hoc inprimis prudenti consilio considerare debet, anne Sveci arma sua, nisi vi coacti, sint deposituri, citra aliquam, quam ipsi vocant realem & perpetuo duraturam satisfactionem: Eo enim vocabulo uti, eoque integras Provincias absorbere amant. Quid hac in materia Westphalica pace transactum fuerit, tabulæ ejus loquantur. Hisce illis Episcopatus Bremens. & Verdenfis sub Titulo Ducatus, Pomerania item Citerior cum principatu Rugiæ & civitate Wisnariæ &c. Compensationis vero loco Serenissimo Brandenburgico Electori Archi-Episcopatus Magdeburgensis, item Hal-

Halberstadiensis & Mindensis : Duci vero Megapolitano pro Vismaria Episcopatus Sverinensis & Razeburgensis in hæreditatem cesserunt. At cum jam nunc nulla vel pauca bona Ecclesiæ in protestantium manibus restant, quæ vocabulo non, magis quam exemplo barbaro in eorum gratiam secularisari possint, quid superest, quin novæ prædæ inhiantes Leones isti, vel pro seipsis, vel ad indemnisationem unius vel alterius Principis, quorum ditiones magis iis ob vicinitatem arrideant : totam Silesiam in satisfactionem, quod vocant, prætendant : quod adeo absurdum iisque haud novum æstimandum. Memoria enim consilio Cæsareo excidere non potuit quod etiam illam, ipsam Silesiæ provinciam in dictis Westphalicæ Pacis tractatibus, una cum reliquis, quas partim obtinuerunt, in partem satisfactionis suæ postulasse. Quod tamen illo tempore objectis aliis offis, declinatum. An nunc autem deficientibus talibus fieri poterit, ambigendum : Uti alias, quæ ab abscissione tantæ, & ob magnitudinem & situationem suam tam amplæ, utilis, imo & necessariæ Domui Austriacæ Provinciæ cum tempore timenda, aliis judicandum relinquitur.

Quod ad omnes *S. R. Imperii ordines* attinet, quibus oculis hanc Svecorum invasionem intueri velint vel debeant, non est quod dubitetur : quæ supra de infractione pacis Westphalicæ dicta sunt, hic omnino quadrant. Etsi Electores hoc Pacisfragio jam incessatos, imo ad incitas redactos, ut Trevirenses, Palatinum & nunc Brandenburgens. (ordine invasionum eos locamus, nec Coloniensem suæ fortunæ fabrum, hîc moramur) interrogare licet : Provinciarum suarum ruinas, subditorum interneccionem, partim etiam Urbium & Villarum incendia loquentur & vindictam uno ore clamitabunt.

Moguntinus & Saxo, fortè & *Bavarus*, nihil hætenus experti, nisi quod nuper in istius Aula ausum Gazettis per orbem fertur ; Sed & isti nullo alio quam ordinis beneficio gaudebunt, vel ad tempus ob longinquitatem tuti sunt.

Celsissima Ducum *Brunsvicens.* & *Laneburgens.* Domus cujus hac in re sententiæ, heroicæ ejus actiones satis testantur : nec

IV.

V.

VI.

Hannoverensis Ducis, ab Uxore Gallica in devium acti, obstinatio obstat, vel longius obstabit. Cum & illum cum tempore, à fratribus in rectam viam reducendi spes adhuc supersit. Uti eorum sinceræ pro libertate Germaniæ intentioni, omnes ad unum Principes civitatesq; Germaniæ, quæ adhuc juris sui sunt, & calamo & armis subscribunt.

VII.

Nunc ad *Hispaniæ* Regem vere Catholicum, relicto suo loco Galliæ, Christianissimo dicto, transeamus: quantum ille hisce, novis armorum motibus commoveatur, non multum inquirendum: Inter hostes n. Galliæ & quidem Primarius cum sit, quis dubitet Majest. suam omne illud quicquid in favorem Galliæ, & per consequens sui & confæderatorum damnum tentatur, alio ac invido, imò irato aspicere oculo posse. Nemo autem omnium Principum, qui in fœdere sunt, majore impetu & ardore progressibus Galliæ se opposuit ac Sereniss. *Electo Brandenburg.* eoque multis illius progressus, quos in Flandria Brabantiaque, facere potuisset, impedivit, plura etiam præstitisset, si semper & ubique ingentia ejus atque in commune Bonum unice tendentia Consilia, non ab aliis concursu simili, ne amplius dicam, fuissent frustrata. Hunc Principem nunc à tam benè inceptis, Svecorum invasione in terras proprias avocatum, quod Regem hunc Catholicum non summoperè percellat, quis non facile existimabit. Inprimis cum à Svecia hæc tentari audiantur, quæ paucis abhinc annis ad Gallorum refrænandam belli alienaque invadendi libidinem cum Anglia & Fœderatis Belgii Provinciis, triplex illud, ut vocabant, Fœdus inierat, quod vel secundum, ipsam Sacram Literam, quis non validissimum, indissolubile, multumque imò æternum duraturum credidisset? Hocque eo quidem tempore, quo tali, quam vocant, diversione, armis Gallicis tantum virium accrescat, quo immanem illam Messinensium seditionem magis ac antea juvare, sicque ad illam à tot seculis concupitam Tyrannidem utriusque Siciliæ Regni pervenire, queant. Non semper enim & quotannis Vesperarum istius loci usus & fortuna recurrit.

Ecclesiast.
c.4.v.12.

Vicinitatis opportunitate hîc quædam de *Portugalliæ* Regni. in his motibus armorum, motu dicenda forent. Sed cum hoc ipsum non minus vinculis Tyranni sui; quam ipsius verus & legitimus Rex *Terceræ* captivus teneatur; Ille ipse autem usurpator, magis adhuc fratriæ itidem & Uxoris suæ, & proinde *Galliæ* nervis regatur; de illius aulæ sensu non alia dicenda expectandaque sunt, quam quæ illi spiritus *Galliæ* infusurraverit. Mireris fortè, Lector, Catholicum me de hac moderni *Portugalliæ* Rectoris Uxore ex ore ferè S. *Johannis Baptistæ* loqui, cum hæc, quæ in negotio isto gesta sunt, Apostolica autoritate facta esse vulgo persvadeantur; sed qui interiora introspicit rerum, facile judicabit istam Sanctam Sedem ejusque sanctum ac incomparabilem Pontificem *Clementem IX.* æternæ memoriæ, ab hoc detestando piaculo longè immunem esse, nullaquæ hîc in culpa laborare, nisi quod falsis *Galliæ* Relationibus fidem habuerit, & Cardinali *Vindocinensi* qui & ob nationem, & cum defertrice, Regina proximam parentelam, maximè in hoc negotio suspectus esse debuisset, tantam tribuerit facultatem, quâ ut certè abusus, rationes & in foro Romano reddere debuisset, at nunc in superiore jam reddidisse, & pœnas transgressi à Christi Vicario accepti mandati gravissimas nunc luere verendum est.

Post Reges hac in causa ab una parte Fœderatos, *Præpotentes unitarum Provinciarum Belgii Ordines* se offerunt; qui ut primi in hac Tragœdia Bellica actores, & initiò à Rege *Galliæ* contra pacta, fas & æquum bello tam immani & truculento, majoribusque adhuc sævitiis, stupris, incendiis, & vastationibus gesto infestati & propemodum deleti fuerunt; Quid in hoc casu sentiant, vix opus est ut inquiramus. Deo equidem O. M. liberationem suam, quod eos in hunc statum, quo nunc gaudent, restituerit, ex asse quidem debent, Qui Gallos, ut tot loca fortia, atque munita, maxima præsidiorum perfidia vel ignavia paucis diebus quasi devorata, tot ferè mensium spatio ultrò quasi, nisi divinam spectes manum, emovere coëgit. At eorum ipsorum & subditorum totius *Belgii* fœderati sententiâ, nulla humana manus plus in hoc negotio operis habuit, nec aliis tribuit ac *Serenif.*

Brann

VIII.

IX.

Brandenb. Electoris, quam promptè, diligenter ac strenuè ille ad restinguendum hoc incendium bis accurrerit, neminem latet. Eoque Gallia iram ac odium in se excitasse, quod primum fraudulentâ pace donisque dissimulare, nunc ipsis Svecorum, nummis ad id conductorum, armis vindicare satius duxit. Si Ordines hoc Fœderati gratitudine non mentali solum sed reali, quod nunc opus, non cognoscant, ingratisimorum sanè calculo merito notarentur. Sed ab hac infami macula tam longè absunt, ut hoc Electoris iteratum officium & debito cultu agnoscant. Et hoc à Svecis ei in odium illius sibi allati auxilii illatum damnum, ut suum proprium existiment: & vel ipsi refarcire, parati sint, vel armis vindicare, omnemque nunc, ut fertur, lapidem moveant, quo Cæsar & Imperium ob hoc tam enorme fœdisfragium, uti jam Gallos fecit, item & Svecos, ut publicos Imperii hostes pronunciet: uti jam illos ab affectato Mediatoris officio, sub cuius larva longiusculè sibi illuserant, jam excisos se declararunt. Justè sanè & prudenter: quid enim justius, quam amicos fœderatos in periculis suis eadem, quâ nobis auxilio fuerunt, alacritate & fide, imprimis si ob id ab inimicis communibus malè habeantur, pariter juvare, quo alii ad eandem alacritatem & fidem imposterum incitentur. Sapienter autem, cum suspectum habere in pacis negotio Mediatorem, ipso quasi bello periculosius sit.

X.

Hoc quod dicimus, nos ad *Dania* Regem deflectere jubet. Etsi an pro verè hac in causâ interessato Principe an neutrali habendus, à quibusdam adhuc ambigatur. Sed ut ad Scopum veniamus, res aliquanto altius repetenda. Flagranti Germaniâ diuturno Svevico bello Rex Christianus Dania IV. pro innata sua pietate, quâ secundum Symbolum suum Regna firmari credebatur, incendium hoc restinguere satagebat, eoque mediationem suam, ut vocant, offerebat: Eaque ab omnibus partibus, præliminaribus illis Hamburgi annis compluribus habitis Tractatibus, erat recepta. Svecis tamen in ipsis cordis penetrabilibus suspecta videbatur. Hinc ut Regem istum ab isto opere pio eliminarent, bellum ipsi sub finem anni 1463. intulerunt, quo jure

jure vel injuria, hîc disquirere locus non est. Sed cum jam nunc eadem ludatur fabula, mutatis, imò inversis solum personis, Serenis. Dania Regi cogitandum relinquitur: Numne illi nunc Svecis idem quod illi Avo suo fecerunt, reddendi occasio optima nata sit, ut scil. eos nunc itidem à mediationis officio, eodem ac illi Ayum olim, aut alio convenientiori modò detrudat. Non dubitet Majest. sua, si in eo permanferint, eoqve quo collimant deduxerint, aliquam Germaniæ partem pro lucro capturos. Sive pro impenfis factis, sive permutatione, ut jam antea dictum. Nec ambigendum, eos pro hoc tempore nondum adhuc Germaniæ meditullia animo suo insatiabili devorare, sed potius maritimis ad Balthicum, inhiare: ubi præter Ducalem Pomeraniam & Borussiam ac Curlandiam (quæ tamen extra Romanum Imperium aleamqve, de qua adhuc lude-re videntur) Rostochium, Lubecam & Holsatiam nihil amplius superest. Cætera jam immani libidine occuparunt, juste, tamen, ut volunt, pactis & Westphalicis & Brembroganis & Roschildensibus. &c. Nec est quod Dania sibi persvadeat, hisce omnibus, Gothiâ scil. Gemptiâ, Blekingiâ, ipsaqve tam amplâ & pulchrâ Scaniâ, immensam Svecorum sitim Provinciarum, scil. sibi adjacentium sedatam: PLUS ULTRA iis semper in ore & animo, & si Dani iis nunquam fidem etiam jurantibus habent, maximè fallentur: Proverbium enim illis: nunquam securò Gæ-tæ (sic Danos vocant) fidendum, nisi in vola manus crines habeat, &c. Prudentia ergo credo Danorum esse, ut idem de Svecis, quas hi multis modis sibi fœdifragos vocare solent, idem retorsione credant, eâdemqve in eos præcautione utantur. Sed de his nimii fortè sumus. Non enim est locus, ut opinamur, ut Danis in communi hac causâ classicum ulterius canamus, nec Regem & potentiâ & viribus, imò animo & juvena pollentem ad arma ulterius provocemus. Libeat saltem Majest. suam ad fenestras Aulæ suæ Hafniensis invitare, ubi quotidie causam belli & vindictæ Scaniam scilicet non minimam nec inveniustam olim Regni sui provinciam, oculis ei illustrare; sed nihil amplius licet.

XI.

Consideratio illa de abdicanda Svecorum in Tractatibus Pacis Mediatione ad Daniæ nos Regem ex connexitate materiæ abripiebat ; adeo ut de Celsiss. *Arausionensium* Principe quædam, etiam dicere huc differendum fuerit.

Egregii hujus & incomparabilis Principis hac in re motus animi alius esse non potest, quam ipsorum ordinum confederati Belgii Generalium. Communis enim utriusque causa conservandæ Potentiæ suæ & respectivè libertatis contra quoscunque, imprimis Galliæ Regem : odioque & armis prosequendi omnes qui eandem nimis sibi vicinam suspectamque Tyrannidem quodam modo juvare possunt : quod cum Sveci novo & inopinato hoc armorum motu imprimis intendant : facilis inde conclusio sequitur. Hoc fœderati Belgii interesse, quod vocant verum & reale est ; nec minus celsissimi Arausionens. Principis esse debet : nisi ad M. Britannia Regis partes magis, quàm par est inclinare, & in turbidis aquis unius vel alterius Provinciæ absoluto, quod vocant, Dominio inhiare videri velit : quod multi eidem ex nupero illo in Geldriæ & Ultrajecti provinciis negotio imputare, voluerunt : quod tamen ejus prudentiâ in herba suppressum : quamvis ejusdem Celsitudinis bono & ad famam ejus optandum fuisset, Nec semen quidem ejus uspiam apparuisse, & per vulgus sparsum, cui talia semper animo & altius quam optaveris, hærent.

XII.

Nunc ad Principes quosdam transeamus, qui ab hac causa planè alieni sunt aut sanè esse deberent : quorum primus omnium se offert *Polonia Rex*. Acerimum hoc à Rege Galliæ unitis Belgii Provinciis illatum bellum, cujus incendium jam universam Germaniam corripuit, jam Prædecessoris moderni scil. Michaelis Regis tempore inchoatum est, nec præsens Regia Majestas partem in illo aliquam habere potest, adeo ut nec ea, quæ ad durationem ejus facere videntur, avere præsumi possit ; Cum illius & totius Regni sui verum & immutabile interesse (ut nunc loquimur) in eo consistat, ut omnes omnino Christiani orbis Principes Pacem inter se perpetuò colant, quò ad molimina hostis illius nominis, suisque affeclis eo fortius resistere, & illi, qui ab
illis

illis armis impetitur, majori vi & successu assistere possint. Et cum jam immanis illorum vis sibi & Regno Poloniae non imminet solum, sed cum tempore fatalis ejus ruina inde timenda; quis ambigere possit, quin Sereniss. Rex pro incomparabili sua & pacis & belli artibus comparata prudentia omnia ægrè ferat, quæ ad durationem belli inter Christianos ansam dare possint. Quod cum de motu illo insperato armorum Svecorum in aperto sit, quin S. Majest. eum summopere detestetur quis dubitet? Sunt tamen quidam, qui se emunctioris nasi esse videntur, qui Reg. S. Majest. alios hinc motus animi habere, & omnino Gallicis in hac causa partibus adstare autumant, idque svasu Sereniss. Conjugis, quæ cum in defunctæ Reginæ Ludovicæ Gynecæo ex Gallia venerit, & ejusdem & Patriæ sensus secum attulerit, & etiamnum foveat. Nobis quidem facies illius aulæ ignota est, non item Regni totius leges & fundamentum, quæ eò, quod à nobis dictum, omnino collimant. Nec est quod vereamur, ne Galliarum vel Sveciarum perversationes verbales vel reales, Prudentissimum Regni hujus Senatum, in quo veterem illam Urbis, quæ Regibus & Principibus, imò toti propemodum Orbi Leges dabat, Majestatem quasi in imagine aspicere licet, & ingentis illius Nobilitatis pro libertate sua Zelotypiam eousque fallant, ut sibi imponere patiantur, vel novum hunc armorum motum ad Pacem reducendam, non vero ad privatam Provinciarum acquisitionem intendere, & Poloniam ac aliquo modo ad eam pertinentes provincias ab hac intentione securas esse posse.

Hos nempe Stationes, & ut cum militiae vulgo loquamur, quartier Lauffund Sammel-Plätze / & quæ eo faciunt, Contributiones Terris Lauenburg & Butowjam indixisse fama fert. Quæ tamen etsi à Sereniss. Electore Brandenburgensi nunc per pacta possidentur, Regni tamen Poloniae fundus sunt, & ad idem suo tempore in pactis constituto redibunt. Alia quidem Ducatus Prussiae ratio est, cujus & supremum unà cum utili Dominio, dicto Sereniss. Electori Pactis Bidgostiensibus cessit: ita tamen ut successio Poloniae Regno in defectum Masculinæ lineæ ejus Serenitatis descendantium ad Regnum Poloniae devolvantur.

XIII.

Hæc Svecos adeo non latent, ut uno & altero cum Serenis. Electore initò fœdere Gvarantiam illius in hac Provincia obtenti Dominiî supremi in se contra quoscunque, ut verba illius loquuntur, in se receperint & pacti sint. Adeo ut incredibile planè videatur quod Gazettis fertur, Ministeriolum quendam Sveciæ in Aula Polonica palpum hunc Proceribus aliquibus obtrudere voluisse, nihil plane Poloniæ interesse, an Serenis. Elector Brandenburgicus aut Sveciæ Rex Prussiam, quam vocant, Ducalem teneat: imò Hunc provinciam hanc feudi Nomine à Regno recepturum, paratum esse &c. Næ! talibus sapientes imò prudentissimi Poloniæ Procere sibi fucum adeo spissum facere, non permittunt. Feudo potentiorē investire, jam olim maxima pro imprudentia habitum. Et cum & hæc Clientela fiduciariæ Patronus in talem habeat, cui hoc titulo provinciam concedit; fiducia scilicet quæ in sola fide Vasalli fundatur, quæ quantum fragilis temporumque mutationibus obnoxia, exemplis patet. In promptu est, omnes S. Romani Imperiî feudatarios Principes in Italia olim subditos, nunc fiduciariò illo jure majori fiducia abutentes, absolutos & independentes à dicto Imperio evasisse. Quânam fiducia Sveci fiduciario hoc jure in Provinciis Bremensi & Pomeraniæ, aliisque ab Imperio eo nomine obtentis habitisque, hoc ipso armorum motu abutantur, non est quod verbis deducatur, cum res ipsæ & effectus loquantur. Milites ibi habent, conscribunt, alunt pro lubitu: non quidem pro numero illis Imperiî legibus præscripto, sed eo, quo pro temporum & libidinis suæ opportunitate vicinas aliorum Statuum Provincias invadere, civitatem hanc vel illam, ut nuper Bremensem, obsidionibus cingere: & sic Imperatorem omniaque in iisdem pro lubitu agere possint. Post tam immanem Fiduciarii juris abusum, nimia sanè & occæcatissima fiducia foret, si sapientissimi Poloniæ Ordines sub hoc nomine Prussiam illam Ducalem iis concederent, & contra jus pactaque tam solenniter iacta, à toto Regno toties consensu Generali in Comitibus Regni, Regioque Jurejurando firmata, in Sveciam transferre, sicque pro
Prim.

Principe Duceqve Amico ac vicino non minus antiquo ac fideli, feudatarium sibi, si non potentiorum, æquè tamen ad præsens potentem Regem accipiant: Dico ad præsens æquè potentem; haud longè enim æqualitas hæc, obsit omen! duratura foret, cum Svecos tot & egregiis maris portubus jure, ut credunt, obtentis & interiores Poloniae Provincias hoc vel illo titulo occupandas animo concepturos, haud dubitandum; hocqve vel obtentu vicinitatis, vel in satisfactionem pro auxiliis præstitis, quibus ut locus, Poloniam per alios laceffendi finem non facient, quo illi semper necessarij esse creduntur: sicqve amicis opem ferendo, ut olim Romani, toto demum Regno potiantur.

Væ hoc casu *Curlandiæ Duci*, cui nondum suæ & domus totius tam funesta incarcerationis memoria excidere potuit, uti nec omnibus Europæ Principibus, qui non suâ potentiâ nixi, Potentiorum insultibus, ut semper patent, ita semper & perpetuo detestanda & execranda erit.

Væ quoqve *Regali*, quam dicunt, *Prussia*, quæ sola cum *Curlandia* & particula parvissima *Samogitiæ Pomeraniæ*que *Electoralis* restant, quin Sveci totius maris *Balthici* ad *Lubecam* & *Holsatiam* usque Domini & Tyranni sint.

Væ inprimis *Gedano*, Ocello isti *Prussiae* & *Emporio* totius *Arctoi Orbis* celeberrimo, de quo cum quædam peculiaria dicenda occurrant, ea quoque sed brevissimè convenienti hoc loco perstringamus.

Quæ Civitas hæc: Omnibus & cœli & terræ Donis ubertim ditata (præter Catholicam fidem, quam tamen suo modo tolerat, permittit, imò in partem defendit) nupero Svecico in Poloniam motu bellò, pro Patria sua Polonia defendenda, pro Rege tunc quasi exule in Solium restituendo, fideliter, magnanimè & feliciter perpetravit: quin hæc omnia dico Svecis in recenti adhuc memoria hæreant, quis dubitaverit? Et dum eos semel offendisse sit satis; non credimus prudentem illius Senatum tantam in fœcordiam prolabi posse, ut unquam fidem sibi à Svecis Amicitiam promittant. Sub regno Poloniae, libertate, quam vocant conscientiae, Juriumque imò Commerciorum, quam

XIV.

optant, tali utuntur, qualem ab alia Potestate suprema, quoque illa esse possit, expectare nusquam possunt. Nec est, quod se Legati illius Svecici, nescio quo pretextu (qui qualis tandem sit, iis & Regno Poloniae non alius, quam exitiosus esse potest) longius apud se commorantis fasciniis capi sinant. Accipiter enim ille Aquilonius lilio initens, quam aliam ac ad Galli cantum cantilenam inchoabit & prosequetur, quæ an Aquilæ Sarmaticæ auribus semper grata immo proficua futura, tempus dabit. Incluta interea Civitas Gedanensis novis hisce Sveciæ motibus, non alio quam ad summam tutelam sui & libertatis, si sapit commoveri potest. Cum non solum arma illius in vicinia sua, nec ad decimum, quod ajunt, lapidem à civitate sua distent. Et in penetralibus habeant peculiare motus, quos Pseudo ille Doctor, cui à Dumeto nomen, inter cives suos excitavit. De quo plura dicere occurrerent, quæ tamen, quasi contrariâ Religione ducti, hæc depromere vellemus, accipi possent. Superfedemus itaque & in præsentiarum. Satis nobis Coronidis loco hæc dicere. Patheticam hujus Sycophantæ in Catholicos invectionem (quasi illius Theologi seculari Magistratui omnem obedientiam reverentiamque in quibusdam Casibus denegent: hocque à suæ Religionis Doctoribus nunquam factum) Hoc inquam egregium hunc Doctorem proprio suo facto & exemplo intervertisse. Sed de hoc satis, senatus Urbis hujus sapientissimus, pro sagacitate sua & huic malo remedium inveniet: & quo ad publicum imminens veteris verbi non obliviscatur: Ab inimico reconciliato cave.

XV.

Vicina Poloniae *Moscovia* quædam etiam de *Magno* ejusdem *Cære* dicendi ansam præbet. Tempus fuit, quo iste ociosus Europæarum Tragædiarum spectator, quivisnam iniis superior vel inferior evaderet admodum securus erat. Nunc autem cum aliquam rerum nostrarum curam habere vel ex eo videatur, quod varias pro medianda & promovenda inter Principes Europæ Pace Legationes hinc inde miserit, meritò æstimandum, Magnum istum Ducem motu quoque isto novo armorum non parum moveri. Et quæ ille in auxilium Poloniae contra Turcam mo-

vit

vit, ad minimum suspectum ei reddere debent omne illud, quod Pacem inter Principes Christianos difficiliorem reddere potest. Hoc cum de novo isto armorum motu omnino verendum, quin ille obliquo oculo eum intueatur, facile censeripotest. Inprimis cum, si ex voto Svecorum cederent, Eorum potentia, quæ merito illi suspecta est, vel esse debet, vel provinciarum novâ accessione vel alio modo accresceret: quâ vel Poloniâ in casum rupturæ, infallibilis cum tempore ad recuperandam Kyoviam, & illam Ukrainæ trans Boristhenem partem (uti secretis inter eos pactis jam conventum certius, quam nudo rumore fertur) eo fortiora auxilia præstare, vel totam suam vim potentiamque in se ipsum ad dilatandos ad Livoniam & Ingriam fines convertere possent. Ultimam Rigæ, quamvis infelicem obsidionem, ex pari invidia vel timore factam quis dubitet: Et quod sine vindictæ & recuperandis spe egregias tot provincias à Svecis sibi bello aliove titulo ereptas recordari non possit. Ingria enim, Carelia, Noteburgum, Narva &c. & ob magnitudinem, fertilitatem, fortitudinem tales sunt ditiones & loca, ut eorum jactura non tam facile nationi, alias ad vindictam pronæ, memoria excidere possint. Cum inprimis ultimo horum à maris Balchici littore, & commerciis magno suo & irreparabili damno eliminati sint.

Mentio Polonici cum *Turca* belli de hoc Tyranno quædam attingere suadet. Et illum motu hoc novo armorum aliquando, imò valde moveri haud est dubium, sed non alio quam ipse Diabolus, gaudii scilicet & tripudii: Immanis ille & juratus Christiani nominis hostis, quid magis aveat optetque, quam ut æternæ inter hujus orbis principes dissensiones sint ac bella, quorum occasione unius vel alterius eorum viscera eò securius, ut nunc in Polonia aliquibus nunc annis fecit, grassari possit. Huc cum motus illi novi apprimè faciunt, quis dubitet illum unicè istis delectari: nisi fortè hoc ipsum aliquando famâ Svecorum armorum moderetur. Quæ vicinitatem eorum & magnitudinem eum iniquo oculo adspicere facit: inprimis cum & eos aliquando Poloniæ opem contra se ferre posse & voluisse credat, Eorum
alias

aliàs fortunæ satis favens, quousque reliquis Europæ Principibus terrori causaque perpetuorum sunt dissidiorum: & tamen à Danubio vel Tira longinquiores absunt.

XVII

Rebelles in Hungaria, qui ab hoc Tyranno in rebellionem suam, contra inclytam Austriacam Domum foveantur, (ut de alio hoc in negotio non minus suspecto Rege nihil dicamus) quin & isti motum hunc novum armorum summo cum gaudio acceperint, non est quod dubitemus. Spes enim illis nascitur, illum ex re sua & cum tempore inde auxilium sibi futurum; quod & fortè eorum, qui Holmiæ fuit, Emissario, Gallico Ministro Conliatore promissum. Inprimis cum Religionis sive Sectæ obtentus in partem causæ motuum horum prætendatur. Hinc miseri isti homines spe lactantur fore, ut restitutio sua in Religionis, quam vocant, libertatem Svecis mediantibus iis obtingere possit: Quod & magis sperabunt, si his Silesiâ uno vel altero titulo potiri contingat. Sed & hujus ipsius provinciæ Incolarum exemplum Hungaros de hac spe deicere deberet: Cum Religionis negotium Sveci in Westphalicæ Pacis Tractatibus parvi sanè faciebant, dummodo eis cessione Provinciarum, quibus tenacius inhiabant, satisfactum fuisset: Hocque contra tot iteratas vel Sacramento firmatas stipulationes. Paribus fortè Hungari & nunc fascinantur, cum alias incredibile foret, eos tanta obstinatione Clementissimas inclyti & optimi Cæsaris oblationes gratiæ susque deque habere, & rebellionem suam, immanibus in Catholicos inprimis Sacerdotes violentiis, cædibus &c. longius protrahere. Sed hic divinæ conversioni, quod optamus, potius quam Justitiæ relictis

XVIII

Ad Italiæ Principes properemus. Hi ad unum omnes quin, novos istos armorum motus summopere detestentur, nullum, prorsus dubium: omnes enim Pacem & quietem Italiæ suæ optant, ad eamque conservandam propensi. Hanc autem accrescente nimium Gallorum potentiâ periclitari, satis in aperto est, & tot eorum in istam provinciam machinationibus constat. Nullus itaque Italiæ Principum totius Provinciæ & propriæ salutis amans hunc in præjudicium aliorum Europæ Regum à Sve-

Sveconum armis juvari vel extendi gaudebit nisi fortè Uxore ex Gallia Gynecæo ducta oblataque sibi magna fugataque spe occæcatus.

Quod ut de quibusdam Italia Principibus timendum forte haud tamen à Serenis. *Venatorum Republ.* quæ ut summus libertatis pacisque Italiae custos & Zelator talibus se in devium ducere non sinet, sed ne hoc vel alio modo Gallia viribus & potentiâ Italia adeò suspectâ, accrescat, pro prudentia sua incomparabili providebit & quoad potest, cavebit. Idem securè de *Republica Genuensium* expectandum, qui potentiam Gallicam, nuper gravem satis experti sunt, adeo ut eam aliquo modo majorem fieri haud optent: Sed potius media & occasiones, ut ad priorem ante hoc bellum statum reduci possit: quantum enim ipsis, imò toti Italiae nova illa Gallorum apud Messinenses vicinia suspecta, & terribilis sit, non est quod viris adeo sagacibus multis persuadendum sit. Tritum est: Tunc tua res agitur, paries cum proximus ardet.

XIX.

Idem, nec alius sensus, procul dubio & *Helvetiorum Reip.* esse potest vel debet, Hocque eo potius, quo Gallia potentia, vicinior iis eoque magis timenda. Vicinos Gallos habere, nec Veteribus Germanis, quorum Helvetii vera & genuina propago, unquam arrisit. Hosque interstitio illo Burgundia Comitatus (vulgo *la franche Conté* dicti) à Gallia quomodo separari hæcenus gavisi sunt: quò jam in Gallorum potestatem & nunc nuper delapso, quid restat, quin Helvetiis nimia illa vicinior potentia indies magis suspecta fiat: adeò ut omne quod eam majorem sibi que formidabiliorem reddere potest, haud aliter, quam inviso aspicere possint oculo. Obvium est, quod diversis, quos vocant, Cantonibus hoc corpus constet, & quod diversis & fœderibus cum aliis Principibus, imò & diversa Religione vel sectis scindatur: at unica tamen illis atque æqualis libertatis cura, adeo ut non verendum, quod accretione potentia adeo sibi vicina & timenda, adeoque hisce novis motibus, qui omnino eò tendunt, & maximopere cum tempore facere, possunt, delectentur, imò quod pulchrae istius Asiae, aliarum

XX.

sibi vicinarum, imò & fœdere junctarum Provinciarum & Urbium vastatione, incendiis & internecione maximè potius contristentur. Majora ex tali novo armorum motu cum tempore timentes. Eoque periculosiora, cum Sveci hisce turbis se immisceant, qui obtentu Religionis tot annorum lustris Germaniam nuper turbantur: non sine ipsius Religionis Catholicæ etiam in vicinia Helvetiæ periculo damnoque.

XXI.

Quod eò Catholicos hujus nationis in fide sua adeo constantes & Zelosos non minus Svecorum arma abhorrere facit ac fortè Reformatis illorum Concivibus haud ingrati sunt eorum, successus: inprimis Urbi *Geneve*, quæ & illa Reip. nomen ambit, quamvis parvitate Domini hoc jure facile excideret, nisi vicinorum Principum æmulatione hætenus substitisset: maximo cum Subaudiæ Ducis cordolio, qui nidum hunc Hæreticorum ut destruere, & quæ olim sub ejus Dominio fuit eidem restituere possit, à tot retro annis nullum non lapidem movit.

XXII.

Vicina Gallix Helvetia nobis eò descedendi occasionem præbet. Cum tamen hujus Regis cum altero Sveciæ eodem, motu nunc agente, communis & sensus & motus credi possint: his duobus ultimo loco relictis, hîc primum de *Britannia Rege* quædam dicamus. Quam personam S. Majestas in hoc bello initio egerit, satis constat, & quod ea depositâ, nunc mediatorum inter partes agere velit, omnibus plus satis notum est. Sveciæ Rex idem hætenus intendit, adeo ut quoad hunc finem, duos horum Regum causâ communis esse hucusque visa sit. Nunc autem cum Sveciâ novo hoc & importuno armorum motu mediatione ista excidisse videatur, ut sanè fœderati Belgii Ordines eò ipso ipsam hoc munere incapacem declararunt; Dubium videtur, an M. Britannia Regi hoc ipsum vel acceptum vel ingratum esse possit. Pro illa parte laborat, quod Mediatoris partibus Ei hoc modo soli relictis major sibi & Coronæ de tam magno in Europæ Bonum deducto negotio gloria mansura. Si autem alius isti Regi & Europam magis adhuc turbandi animus, dubium haud est, illum hoc novo armorum motu dolere, quo illi in negotio Pacis pro lubitu remorando vel distrahendo tam
utilis

utilis & fidelis socius deficiet; ad quem ad minimum, si non majorem, mediam tamen rei non in utilitatem Christiani orbis gestæ culpam devolvere posset. Sed hæc de Rege Titulo illo Magnifico defensionis fidei superbiente, non sunt credenda? Quamvis enim illum unus ex prædecessoribus suis ab Apostolica Sede pro Catholicæ fidei defensione acceperit: Nunc eodem contra istam S. sedem pro defectis ab ea hæreticis abutitur: quod tamen Parlamentum istius Regni potius forte facere videri potest: Illud enim rem Hæreticorum & domi & foris strenuè gerere & defendere dubium nullum est: Nec proinde hoc in negotio manet, illud nigro quod ajunt calculo motum hunc armorum Svecicorum notaturum, Regisque actiones majori curâ, imò cautione observaturum, ne illis applaudit, eoqve Generalis Pacis negotium in dubium vel longius trahat. De quo sessio dicti Parlamenti mox habitura certitudinem monstrabit, & fortè majora, tristioraqve quam nunc adhuc suspicari licet.

Restat nunc, ut de Gallia & Sveciæ Regibus maximè in hac re, conjunctis & vera adversa cæteris parte quædam dicamus. Quod primum, Christianissimum vulgo dictum: quid de hoc novo armorum motu sentiat, haud anxius inquirendum, cum enim hæc omnia ejusdem svasu, ductu & pecuniâ acta sint, & etiamnum agantur, quis dubitet illum eo quam maximè gaudere: Sicqve Gallum Aquilonium illum Leonem ad cantum suum agere ac Tributarium sibi quodammodo fecisse superbire, cristasque inde altius tollere. Hinc majores in Belgio, Germaniaque superiore, Alsatia inprimis sibi armorum suorum progressus promittit. Obice illo primario Brandenburgensi Electore inde remoto & ad Tutamen suarum Provinciæ, hocce ipsorum Svecorum armorum motu avvocato. Hinc non solum Messenæ urbis delatam sibi protectionem & Dominium, at totius Siciliæ certam & perpetuam animo volvit, sed & majores Coronæ suæ in Italia, Belgio, imò Hispania ipsa accessiones.

An autem Parlamenta Regni, inprimis supremum illud Lutetianum, cujus olim ante illam à Richelio introductam & hinc usurpatam Tyrannidem, tanta autoritas, ut Decreta Re-

XXIII.

XXIV.

gia primum suæ censuræ subicere, & post eam valida vel invalida judicare posset, eundem cum Rege suo motum in hoc negotio habeant, valde dubitamus, Pacem & illa totumque Galliarum Regnum optant, unoque ore clamitant: Eamque realem, & ut ante decennium aut quod excurrit, in curia illa quam vulgo des aides vocant, primus Præses emphaticè edixit: quæ non inani verborum sono, sed reipsa constaret, scilicet impositionum, contributionum, aliarumque rerum non magis verbo, quàm ipso actu barbararum omnimodâ cessatione. An expeditionis illius nobilitatis Generalis, vulgo Ban & Arriereban dicti alia sententia, vix dubitandum; maximè autem, an ipsa nobilitas appropinquante ætate extra Regnum, quod contra Privilegia sua esse credit, post tot superiore ætate perpeffos labores rei que familiaris incommoda non minus ac personarum jacturas comparare, velint.

XXV.

Suecia Regem quod attinet, de motu animi illius haud occurrit multa dicere: Cum sine eodem motus ille armorum haud accidisset. Quis tamen Regi Juveni, & tam Belligerâ Prosapiâ nato, vitio vertet ansam eam ad novum bellum Galliarum pervasionibus, iisque adeo ponderosis arripuisse: quod jam dictum argumentum Proceres suos eò quoque commovit. Inter eos quidam sunt, qui originem Galliarum, adeoque & adfectum huic genti se debere putant: alii qui incolatum istius Regni pecuniâ se jure accepisse credunt, non datâ quidem, sed recepta: Immunem ab hac peste omnino credo supremum Regni Archistrategum, qui semper factioni illi Gallicæ fuit contrarius, etsi jam pro ea Martias quosdam actiones agere jussus est, hic potius famâ, quàm genio proprio acturus esse credendus: Virenim est egregius, & nulli qui arma nunc ut supremi Duces tractant, postponendus. Conscientiæ tamen & famæ studens: hæc enim ut immortalia, symbolo suo optat.

Quid autem totius *Suecia Regni Ordines* in Comitibus mox habendis de hoc motu armorum sentiant, sub judice lis est: Pacem & illos optare haud est dubium, cum eò omnium omnino hominum vota proprio motu colliment: nec est dubium & vel quar-

rum istius Regni ordinem sive homines Rurales ejusdem sensus esse bellumque detestari, cum hinc & illis contributiones & quod magnum illis onus descriptiones militum, das *Mus* schreiben/ multiplicentur. A superioribus quidem statibus illis infusurratur, bellum hoc longe ab illorum finibus rationibusque distare, & ad mediationem tantum illius, quæ hætenus tribuerunt, collata. Cætera & quæ fortè ad perniciem regni sequuntur, Magnatibus qui Regem obsident, tribuenda: de quibus aliquando magnam debitamque reddent rationem, non solum in sequentibus Comitibus, sed aliquo quoque superiore foro, de quo equidem Magnates istius Aulae satis securi; nusquam enim Atheismus majores radices egit, quam cum *Christiana* Regina Ductoribus quibusdam Gallis manum ei, ante conversionem ad Catholicam fidem, dedisset; Et populi isti hæresi obscurissima occæcati parum rectè de ista re sentire aut loqui possunt. Sensus tamen, quem exprimere fatagunt, eo tendit: Quocunque Regem suum novo bello Germanico, cujus fors ambigua, & an successum prioris illius habere possit, valdè dubium, immiscere intendunt. Eos contra verum & genuinum patriæ interesse agere illudque planè prodituros, si Regem suum alias independentem, ab alia, ut Galliarum Corona dependentem ac pecuniâ tributarium fecerint. Hæc illi. Si autem ut Catholicum me hic loqui permissum: certum credo Pseudo-illos Sveciæ-Episcopos & Presbiteros Magnatibus suis hoc quod diximus scelus novi scil. inchoati belli & malorum inde scaturientium, nec in articulo mortis, remittere, nec ab eo eos absolvere posse nec valere nec ipsum quidem summum Pontificem, nisi omnes singulique veniam illius debita conversione, requirant: à quo eum jam longè abesse videantur, quid restat, quin eos scelus tam immane hoc, quo totum orbem Christianum longiore & diuturniore bello involvere & irretire allaborant, non in purgatorio quod hæresi sua non credant, sed in infimo illo inferni barathro expiaturus credendum vel verendum sit.

Quo etiam vulgi vota certo certius inclinare non est quod inficiemur. Quamvis Christiana Pietas aliud, & præcipuè conversionem omnium peccatorum, publici illi sint status & con-

ditionis vel privatae, animitus optare debeat. Vox enim ejus solennis, cui Deus & suo tempore calculum vigoremque addat:

Nulla salus bello, Pacem te poscimus omnes.

XXVIII.

Jer. I. V. 14.

Non ordinis causâ commoveantur quæsumus *Libere Hanseatici fœderis Civitates*: non enim alium eis animorum hic motum esse credimus eorumque vulgo, qui cætero. Tempus fuit cum illustre & potens hoc fœdus Leges Regibus etiam Aquilonaribus daret, & vel una ejusdem civitas, sed caput, *Lubeca*, Reges Sveciæ & imponeret & deponeret; sed jam alius rerum status, nec alia nunc à plaga Civitatibus istis magis metuendum, quam ab Aquilone, unde nobis omne malum *Lubeca* quidem ipsa viciniâ Daniæ aliquanto securior agit: *Hamburgo* ab utroque Arctoo Rege timendum propter jus, quod unus in fundum ipsius urbis prætendit: & alter ex Ecclesiæ olim Cathedralis in eodem ad ductum nunc *Bremensem* spectante Dominio. Quid istud Sveciæ Regnum eodem jure in Civitatem ipsam *Bremensem* prætendat, satis notum, & obsidione istius urbis nimis ut Politicis visum, præcipitata, satis manifestum reddiderunt. Et hæc quidem Principales dicti fœderis Hanseatici urbes: De *Brunsviga* enim & *Magdeburgi* libertate jam pridem actum est: Cæteræ vel titulo liberarum S. Imperij Civitatum gaudentes, parum fœderis istius nexum curant: aliæ quo minus id facere possint, ut mancipia à principibus suis vi majori impediuntur. Quis itaque illius fœderis civitatum in hoc negotio motus animorum alius esse potest quam novo hoc belli motu contristari ac ingemiscere, cum ut non majora belli incommoda hic enumeremus, commercia eo omnino turbantur, & prorsus ab eorum oris eliminantur, quæ tamen vita & anima istarum civitatum, quæ omnino hoc sibi dictum putent, quod magnus Politicæ Doctor de minoribus potestatibus sive Principibus perquam verè dixit: *Quies vobis tutior, nec de obtinendo laborate, sed de tenendo vel conservando*: quod ibi testudinis exemplô ex Livio petito aptissimè probat. Cujus tamen ex observantia exempla satis stringentia allegare non est opus, cum obvia passim, quamvis & non minus odiosa sint.

Lipsius
Polit. 4. c. 9

XXIX.

Cum jam Principum ferè omnium, quorum hoc in negotio

tio quomodocunque interesse potest, animi motus, imò & vulgi pro modulo consideravimus: Non vitio nobis vertendum putamus: si & summi Principis *DEI* scil. *Opt. Max.* ut Regis Regum & Dominationum supremi Dominantis & judicis infallibilis de eodem motum animi, si & quatenus divina ejus essentia motum aliquem habere potest, in medium proferamus: non tamen ex nostra equidem mente, sed ipsius Oraculi sui verbis, quibus de hoc ipso novo armorum motu ita eum sentire credendum. *Qui habitat in cœlis irridebit eos, & Dominus subsannabit eos, loquentur ad eos in ira sua, & in furore suo conturbabit eos. Reget eos in virga ferrea, & tanquam vas figuli confinget eos, &c.* Abominatur enim Dominus virum sanguinarium & dolosum: & dissipat gentes, quæ bella volunt, (malunt, amant vel alia ex aliis serunt) eosque postquam iis, uti virgâ iræ suæ ad castigandos filios suos pro justitiâ quidem suâ, sed Clementiâ tamen summa temperata, lusus fuerit, tandem filiis reconciliatis in ignem iræ æternum detrudet.

Quod ut summâ suâ benignitate & in his motibus adimplere velit animus precamur. Ex intimis cordis penetralibus cum Propheta clamantes: *O mucro Domini, usquequò non aquiesces? ingredere in vaginam tuam, refrigerare & sile.* Cogita super nos cogitationes Pacis & non afflictionis: ut des nobis finem (malorum) & patientiam, & invocabimus te & vivemus. *Et ego, ait DEUS, exaudiam vos; quæretis me & invenietis, cum quaesieritis me (sed NB.) in toto corde vestro. Tunc inveniar à vobis, ait*

Dominus, & reducam captivitatem vestram, &c. Fiat, fiat!

*Psal. 2. v. 4.
5. & 9.*

*Psal. 5. v. 7.
Psal. 67. v.*

*33.
Esa. 10. v. 5.
16. & seqq.*

XXX.

*Jerem. c.
47. v. 6.
Et cap. 29.
v. 11. & c.*



- F. XII. 20

6856

